

## Duez Gobt Nih Mac Laaux

Lix duez gobt ndeul hal leg deel qyuh biangh nyal guehxamz. Lix daag waaiz ndeul guas jiez deec, leg duez gobt deec nauz: “Daag waaiz nix laaux laauhhoh nax.” Diec deel nauz: “Xoohrez gul haslix mac laaux geh daag waaiz nix deeml.”

Ieh deel xingh angh dungx gueh deenz. Xez deec leg deel qyuh heenz ndaangl deel nauz: “Diec, mengz nih angh dungx gueh laaux, gaais nix mengz nih longl bais. Ieh bais, aul rooxheeh ndaanglgaus laaux saauh laez xic laaux saauh deec. Hac gueh laaux geh yac gueh miz banz.”

Mizguanc diec deel laaul waaihnac, haslix xingh angh dungx gueh deenz geh, deel nauz: “Gul aul leeux ndaangl gul bians laaux geh daag waaiz nix, qyuh lacmbenl miz lix yaangzmaz suans banz gueh geh yaangz nix deeml.” Leg deel daaus daanz nauz: “Diec, mengz gueh dangcnix gah ral gaais naanh xus ndaangl, haec gul qyuh heenz qyah eemh mengz deeml. Gueh dangcnix gueh dangz guaslangl mengz gah booilxix.” Mizguanc diec deel damcduangc, nauz: “Xaamx gul xingh angh dangcnix bail nac, guaslangl gul aanh laaux

geh daag waaiz nix jiezraaix. Yianh nix jongs leg, jongs laanl  
gul xic qyox gul banz beengz bais.” Ieh deel xic xingh angh,  
xingh angh, angh naanz laail guas dungx xic dees bais.

## Duez Waauc Jaus Gais Bux

Lix ngonz ndeeul, lix duez gais bux ndeeul bail bool ral mbahyaangz genl. Lix duez fuzlih ndeeul qyuh jail yius reenl duez gais bux byaaic dauc, xic soohnyaangh bail ninz jaangl ronl gueh lumcbux daail nic. Ndael saml deel ndiabk: “Xac duez gais bux deec byaaic dangz dooisnac gul, gul sooh gaab aul deel, miz xac laih, miz bail neec reengz laez yac ndaix genl nooh gais bais.”

Gais bux miz rooxheeh yaangz suans nix, deel ndingh byaaic ndingh ral gaais genl. Xez deel byaaic liez duez fuzlih miz lix saauh laez jail deec, lix duez waauc ndeeul ooh guas gogt nyal heenz ndaangl deel dauc nauz haec deel: “Mengz miz haec byaaic bail nac bais, baaih nac lix duez fuzlih ndeeul, neec deeml deel genl mengz ges!” Duez gais bux deec haslix riangz duez waauc deec nauz: “Duez fuzlih deec daail bais, mengz xuangs saml, fuzlih daail deel genl miz ndaix gul.” Duez waauc daaus nauz: “Deel miz deg daail, deel haslix jaul.” Baiz nix duez waauc xangcih nauz hingl laaux: “Xaamx deg fuzlih daail, bas deel xic ax bais, deel wooil yaangzmaz haabt bas mus?”

Duez fuzlih rooxnyiel duez waauc nauz, deel xic soohnyaangh ax bas. Duez waauc daaus riangz gais bux nauz: “Mengz qyox reenl fih, fuzlih daail ieh, bas deel guehmaz haslix roox ningl mus?” Gais bux xaaux rooxheeh duez fuzlih gacloox, deel soohnyaangh riangz duez waauc nauz: “Doolsiel mengz jaus gul, xaamx miz lix mengz, duez fuzlih deec aanh genl gul bais.”

## Duez Gugt Ndinghal Duez Fuzlih

Lix duez gugt ndeeul, xez deel haslix xooz deec, deel ndangh geh leeuxboz, mizguanc xez nix bilniansz jees bais, bail rooh ral mbahyaangz genl miz ndaix. Duez gugt xic qyuh ndael gaamc gacloox nauz gueh banz bingh. Duez ducrec, duez lingz, duez malnaiz, hal duez faanz dauc eemh deel. Leeuxboz gueh baiz dooh ndoonx bail ndael gaamc deec. Duez gugt xic aangh leeux, deel xic soohnyaangh bail dool bas gaamc, gaab baiz duez baiz duez genl leeux.

Guas ndaix neec ndeeul, duez fuzlih yac dauc eemh duez gugt, deel byaaic bail bas gaamc, qyox sis wees heenz, reenl bas gaamc lix laail ruizdinl, mizguanc saauh gaais ruizdinl deec lix ndoonx bail ndael, miz lix ooh dauc rooh. Duez fuzlih byaaic daaus langl soongl qyaamh, riangz duez gugt nauz: “Bingh mengz ndil neeh fih?” Duez gugt haanl naaisngazngeegt: “Ndil neeh bais, doolsiel mengz dauc qyox gul, dauc ndael nangh las.” Duez fuzlih miz gaamc ndoonx bail. Duez gugt xac miz ndaix xic seedt dauc baaih rooh hac aul gaab deel. Duez fuzlih yius reenl miz hoz bais, xic mbidt nac leez deeuz bais, duez gugt laih miz deebk. Duez fuzlih qyuh jail riangz duez gugt nauz: “Dacsiams gul reenl bas

gaamec lix ruizdinl, mizzic gul yac ngaix mengz genl deeml  
bais.”

## **Bux Hooc Bians Banz Guaangl**

Lix bux ndeeul, raanz deel hooc laail. Deel ooh bail rooh baangl feax gueh hoongl aul xeenz. Bail ndaix hac bil miz reenl fanl xeenz laez, mbanh nix deel daaus dauc raanz.

Lix ngonz ndeeul deel bail bool aul fenz, yius reenl jaangl nyal lix mongx rog, deel xic beangc qyox, ndael mongx rog deec lix beedt ndeenl jais rog gaisgail. Deel xic aul dauc raanz haec gais faag. Faag ooh gaisgail neec, deel xic xiangx gueh laaux. Hohdeec laaux xic dauc jais, ieh xic daaus aul jais faag. Deel miz genl jais, yac miz gac duez laez genl. Guas ndaix sis hac bil, deel xic lix jic bas faanh duez rog gaisgail.

Baiz nix hoh gueh gax rooxheeh raanz deel lix rog gaisgail laail, hohdeec xic bail raanz deel xex aul rog gaisgail. Deel gaail rog gaisgail ndaix xeenz laail, deel xic banz guaangl bais. Meanh xaax deel hooc laail xic miz lix bux laez jaiz deel, xez nix deel lix xeenz laail bux laez yac jaiz deel yac maaic deel. Deel lix xeenz laail, deel yac maaic baangl bux hooc, yac jaiz bux hooc, deel nauz: “Bux guaangl bux hooc aul jaiz dungxlumc xaax hoz.”

## **Duez Langx Ndinghal Duez Mal Yeeh**

Lix ngonz ndeeul, lix duez mal ndeeul ninz basdul hooch max. Lix duez langx ndeeul yius reenl, duez langx deec xic ndiabk: “Gul fih ndaix genl nooh mal daaus laez guas, baiz nix gul lac ndaix ximz nooh mal bais.” Ieh duez langx xic seedt bail gaab ndaix duez mal deec, naaiz rongz leeux xic hac genl duez mal lac ndil. Duez mal rooxnyinh, deel xic xaaml duez langx nauz: “Xaaml mengz miz haec genl gul, hohrauz deg bux jaec. Meanh xaux hohrauz deg raanz wenz dooh.” Duez langx miz gacnyiel xic nauz: “Gul miz guanh gaais suans meanh xaux deec.”

Duez mal nauz: “Mengz qyox, ndaangl gul byooml lumc ndaagt ndooh nic. Genl xic lix maz waanl mus? Guas ndianl ndeeul deeml, sucraanz gul aul baans mbaaih. Beens dangz xez deec gul yac laaux yac oonh. Songs bail haec mengz genl miz ndil geh mus maz?” Duez langx xic il deel nauz, xic xuangs duez mal deec daaus bail aangh leeux.

Guas ndianl ndeeul ieh, duez langx daaus dauc dangz basdul raanz hooch max. Duez mal ndiex genz raanz hooch max, reeul

xus duez langx: “Mengz uax laail, baiz langl reenl gul ninz  
basdul hooh max, xic aamh dooh genl gul guehleeux bais,  
miz haec xac ndianl ndeeul deeml.” Duez langx rooxheeh deg  
duez mal gacloox deel, xic deeuz daaus bail naches leeux.

## Weeh Wal

Lix ngonz ndeeul, laauhsec nauz haec xozsenc weeh wal, weeh faix, weeh raanz, weeh bool. Lix xooix ndeeul xoox nauz gueh Lihlil, weeh raanz hal bool banz bais, xic lac weeh faix, mizguanc miz lix jiancbiz log. Deel xingh qyox xooix qyuh heenz deel xoox nauz gueh Linx deec. Linx weeh faix banz bais, mbael faix log leeux, ndiljaiz laauhhoh. Lihlil xic riangz Linx nauz: “Xaaml mengz aul jiancbiz log haec gul yungh neec ndeeul banz miz?” Linx nauz: “Gul weeh fih leeux.” Lihlil xic bomc genz xoongz eemh Linx weeh. Deel weeh leeux bais, Lihlil nauz: “Xez nix mengz weeh leeux, xaaml aul haec gul weeh neec ndeeul bees.”

Linx nauz: “Gul laaul mengz haaix raagt haec gul.” Lihlil nauz: “Gul xic reel ndilriz, miz haaix raagt haec mengz.” Linx xic qyogt ndael haabk deel jangl jiancbiz deec ndaix seenc jiancbiz log dauc, nauz: “Mengz reel neeh noox! Xez mengz weeh deec miz haec yungh reengz, miz haec weeh laail guas.” Lihlil haanl: “Gul weeh mbael faix hal nyal neec ndooil ndais.” Linx nauz: “Haslix weeh nyal neec deeml hax?” Lihlil xic xingh eemh Linx, miz aul seenc jiancbiz log

deel deec bais. Lihlil xic gah aul seenc jiancbiz bigt deel deec dauc weeh, haaix weeh bigt leeux.

Laauhsec aul eemh idt xooix xozsenc weeh banz dangclaez, deel byaaic bail dangz heenz ndaangl Lihliz, reenl gaais Lihlil weeh deec, xic aul haec leeuxboz qyox. Laauhsec nauz: “Mbael faix hal nyal deg log, miz deg bigt, mizguanc Lihlil weeh ndaix nams, ndiljaiz laauhhoh.”

## **Duez Secseh Ndinghal Duez Waauc**

Ndianl ndaadc, duez secseh qyuh lac gogt gool faix raucninz. Duez waauc neec degxangz ndeeul yongc bail genz ndangl duez secseh guehxamz, nangc hauxyaangz. Secseh iadc fengz gaab ndaix duez waauc neec.

Secseh nauz: “Laauxxooz, loongh gul mus leez,” xic ax bas guaangs, lac aul genl waauc neec. Duez waauc neec ndillaaul hac daail, xic jauz leeux jauz moos, nauz: “Mengz bux laaux, xaaml mengz raux gul, guaslangl gul aanh aul deenzanl mengz.” Secseh gohsiz duez waauc neec, deel ndiabk, duez waauc neec neec duc miz hoz gaz jeeh heeuc. Ieh deel xic xuangs duez waauc neec deeuz.

Ngonz daz ngih, secseh miz reel ndilriz, wenz deg raaih xic gaab ndaix deel. Wenz deg raaih yiadc secseh xus gool faix laaux, nauz: “Mengz ganx qyuh ndongl faix bail mal bail mal, xez nix hohdul haec wenz ndael mbaanx dauc eemh mengz, eemh mengz ngaix deg xoog xus gool faix.” Wenz deg raaih reeul rianh leeux xic deeuz bais. Secseh hooznyaz laauihhoh.

Qyuh xez deec duez waauc neec dauc dangz lac gool faix,  
soongl saaml baiz xic gaadt xah yiadk secseh deec gons.  
Secseh doolsiel duez waauc neec daaus leeux daaus moos.  
Duez waauc nauz: “Miz lix yaangzmaz, deenzanl mengz,  
gaais nix deg gul aanh aul baangl.” Duez waauc neec yaaux  
fengz xic deeuz bais.

Gulsel nix deg nauz, gueh xez bux laaux yac meangh bux  
neec baangl.

## Duez Meeuz Degt Byal

Lix ngonz ndeeul, duez meeuz wal neec nih genl byal, deel bail xiez meeuz heenc, meeuz foonx, meeuz haaul bail degt byal. Hohdeec ndaix mbal reel laaux ndeeul bail, byaaic ndaix neec ndeeul xic bail dangz baangx dah. Hohdeec xic xuangs reel xus ndael dah, guas ndaix neec ndeeul leeuxboz xic looh reel dauc genz. Hohdeec looh reel lac dangz basramx, xic yius reenl ndael reel deec lix byal laail laauhhoh, jongs duez meeuz neec deec haaix gaais naaiz rongz leeux.

Xez deec, ndael saml meeuz wal ndiabk: *Raanz gul qyuh baaih dungcfangc, gul aul looh bail baaih dungcfangc*. Ndael saml meeuz heenc ndiabk: *Raanz gul qyuh baaih xicfangc, gul aul looh bail baaih xicfangc*. Ndael saml meeuz foonx ndiabk: *Raanz gul qyuh baaih naanxfangc, gul aul looh bail baaih naanxfangc*. Ndael saml meeuz haaul ndiabk: *Raanz gul qyuh baaih beezfangc, gul aul looh bail baaih beezfangc*. Ieh hohdeec daangs bux daangs looh bail baaih raanz bux daangs, looh gaais haanh xoonh leeux. Looh ndaix gus ndeeul, mbal reel

deec xic sigt bais. Leeuxboz xic qyox jongs duez byal deeuz  
bail ndael dah ndooil.

Jongs duez meeuz neec mengz gaaais gul, gul gaaais mengz,  
dungx ndah deens ndeeul. Guaslangl daangs bux daangs gah  
nyaz ndaanglgaus, daaus bail raanz ndooil.

## Daagt Haux

Bil daz idt bail Lachoos dooh sel, diec gul xic songs gul bail. Deel miz haec gul qyuh xozxaaul, xic haec gul bail raanz lungz gul qyuh. Gul miz jaiz bail, mizguanc diec gul miz il. Raanz lungz gul lix beedt bux wenz, gahdamx lungz gul deg bux jees. Gul xaaux bail dangz moos, genl haux duc rooxnyiel waaihnac, gueh fex genl haux miz imh.

Lix daaus ndeeul, leeux raanz dungx qyuh genl haux, lungz gul genl haux leeux, xic yangx dooix haec laanl deel daagt. Gul xic ndiabk: *Dooix langl gul aul baangl deel daagt. Guas ndaix neec ndeeul, gul reenl lungz gul lumcbux genl haux leeux nic. Gul xic byaaic bail dangz heenz ndaangl deel, aul baangl deel daagt, mizguanc ndael dooix deel haslix haux. Gul miz roox gueh dangclaez gueh, xingh ndunl qyuh jiez deec xac. Leeuxboz rooxheeh gul aul daagt haux haec lungz gul, mizguanc miz lix bux laez nauz yaangzmaz. Gul ndiabk: *Xaamx gul daaus bail nangh, xac deel genl haux leeux xaaux bail baangl deel daagt, xic qyahfaz geh. Xez deec gul xingh xac haaix gaais nac raaih leeux, riez gul yac ndingl lumc joos fiz nic. Deel genl leeux ieh, xic yangx dooix haec gul bail daagt,**

yac miz gaangc haaus, xic ndamx ndamx ndooil. Fex haux  
deec gul xic xeehleeux waaihnac bais, haaix ooh genl haux  
miz imh, xic gah ieh dangz ndax ndooil.

## Duez Langx Laaux Ndinghal Duez Yuangz Neec

Lix ngonz ndeeul banz ndaadk laaux. Lix duez yuangz neec ndeeul seedt bail baangx dah genl ramx. Miz hoz bais, lix duez langx laaux ndeeul waaic baaih genz dauc lac. Duez langx yius reenl duez yuangz neec xic naaiz rongz leeux, ndael saml ndiabk: *Duez yuangz neec nix yac oonh yac unh, ral xonz haaus maz dauc nauz genl deel bais.*

Ieh duez langx laaux xic ndunl baaih genz, riangz yuangz neec nauz, “Yuangz neec, mengz wooil guehmaz xangcih guais ramx gueh nongz, haec gul miz ndaix genl ramx sael mus?” Duez yuangz neec qyaux jauc yius reenl duez langx laaux, saml deel wangc leeux, nauz: “Langx goc, mengz qyuh baaih genz, gul qyuh baaih lac gueh dangclaez haaix ramx nongz bail dangz jieez mengz deec mus?” Duez langx miz lix haaus nauz. Ieh deel daaus nauz: “Bil guas mengz nauz haaus qyah gul.” Duez yuangz neec soohnyaangh daaus nauz: “Bil guas fih lix gul.” Duez langx laaux daaus nauz: “Gaaisdeec deg sucraanz mengz ndiabk aul haaix gul.” Duez yuangz neec nauz: “Gaaisdeec xic riangz gul lix yaangzmaz mus?” Duez langx laaux miz lix haaus maz nauz, xic hac ax

bas genl duez yuangz neec deec. Duez yuangz neec deec baiz  
his dooh yuaanc deeuz, miz ngaix duez langx deec genl.

Deeus gulsel nix xic deg nauz, miz haec riangz wenz waaih  
gaangc haaus ndil.

## Jazjinh Nangh Roonghndianl

Meanh xaux, Jazjinh guaail guas, xic aul deel bail xus ndael dalngonz, gauc deel gueh dangclaez gueh. Ndael dalngonz deec ndaadk laail, Jazjinh xic haanh lail leeux. Mizguanc Jazjinh xeenh heeuh nauz: “Xamx laauhhoh! Xamx laauhhoh! Xeeh ndaix xamx jiezraaix bais! Siangs miz lix jiez laez xamx geh jiez nix deeml bais.”

Jazjinh xeenh gueh dangcnix heeuh, bux nangh roonghndianl deec rooxnyiel, deel xic riangz Jazjinh nauz: “Hohrauz dungx weanh bees. Mengz dauc nangh roonghndianl, gul bail nangh dalngonz.” Jazjinh haanl: “Miz banz! Gul qyuh dalngonz ndees. Jiez gul nix xamx geh, gul miz riangz mengz dungx weanh jiezraaix!” Bux nangh roonghndianl deec nauz: “Jiez nix yac miz ndaadk, dauc rauz dungx weanh bees.” Jazjinh haanl nauz: “Gul xeeh miz ndaix deeuz jiez nix, gul miz riangz mengz dungx weanh jiezraaix.” Bux nangh roonghndianl deec rooxnyiel Jazjinh nauz ndael dalngonz xamx, deel xic jaailnauz qyuh ndael dalngonz xamx jiezraaix. Deel xic xaaml Jazjinh nauz: “Xaaml mengz riangz gul dungx weanh gox! Gul xaaml mengz bees.” Jazjinh nauz:

“Mengz xeenh xaaml gul, gul xic riangz mengz dungx weanh las.”

Dangcnix, Jazjinh xic riangz deel dungx weanh, bux deec bail dangz dalngonz xic ngas ndaadk rianh leeux, mizguanc Jazjinh xic miz daaus riangz deel dungx weanh bais. Jazjinh xic gueh dangcnix ndaix bail nangh roonghndianl bais. Beens dangz xez nix, bux wenz yius reenl roonghndianl ooh dauc, xic nauz, Jazjinh nangh roonghndianl.

## Nangh Gool Faix

Xez gul ndaix xib idt ngih bil deec, lix haadt ndeeul, gul hal soongl faangx buxduz bail daez xiez. Hohdul xic laih xiez bail baaih lac rih dueh daez, dinl rih dueh deec banz xaagt yac lix gool faix naaul ndeeul, laaux lumc gogt gal laaux bux laaux nic. Gool faix deec lix saaml jis baanz bail unx, jis ndeeul dangc bail genz, reenl ndil nangh laauhhoh. Gul hal faangx buxduz ndeeul xic henc bail gool faix deec nangh, haslix bux ndeeul gah qyuh baaih lac guehxamz. Hohdul xic nangh gool faix deec ndingh yaaux ndingh nauz weanl rianh leeux.

Siangs nangh gool faix deec ndaix soongl gaauh xuangl dangcnix, ieh bux qyuh baaih lac deec lac henc dauc genz riangz hohdul. Hohdul xic nauz: “Mengz nyah henc dauc genz bais, gool faix nix dox miz ndaix rianz laail, neec deeml hohrauz dogt bail lac ges.” Mizguanc deel miz il, haslix henc dauc genz riangz hohdul nangh.

Ieh saaml bux dul xic qyuh gool faix deec, ndingh yaaux ndingh dungx nyiex. Guas ndaix neec ndeeul, gool faix deec

xic bod rah goongl bail basnaamh hoongz bub deec, haaix gaais nyal jiez deec nieh leeux. Xez gool faix goongl deec, hohdul duc naches, yac ngas banz faangh dooh. Mizguanc hohdul dogt dauc dangz lac, yac miz lix bux laez jeedt. Ieh hohdul xic soohnyaangh boc baabt reeul rianh leeux, xic gah dungx nauz: “Daaus nix hohrauz ndaix nangh fooicjic bais.”

## Bux Neec Dez Sooh

Lix xooix ndeeul, xoooh nauz gueh Leezlinx. Xez Leezlinx ndaix beedt bil deec, lix ngonz ndeeul deel riangz diec deel bail raanz bac deel gueh hees. Nuangx biah deal hal biah seeh deel reenl deel dangz xic aangh leeux, looh deel bail guehxamz. Hohdeec xic qyuh ndael roog guehxamz, Leezlinx ndoobk xoongz, genz xoongz lix bingz wal xic dogt dauc lac dees bais. Hohdeec haslix guehxamz ndilmaiz, miz lix bux laez qyox, haslix dungx laih. Bac deel rooxnyiel, xic seedt dauc gauc, xic hams: “Deg bux laez haaix dees mus?” Jongs bixnuangx biah dauc nauz: “Miz deg gul.” Leezlinx gauz jauc, yac nauz: “Miz deg gul.” Bac deel xic reeul nauz: “Gaaisdeec xic deg bingz wal gah dogt dauc lac dees nax.” Jongs bixnuangx biah xic reeul, gahdamx Leezlinx miz reeul.

Leezlinx dauc dangz raanz, ninz ndael deenh miz gaangc haas. Mac deel hams deel: “Mengz guehmaz miz reeul mus?” Leezlinx nauz gaais suans bingz dees deec haec mac deel. Mac deel xic nauz deel raaz sins bail lingx longl bac deel. Bac deel ndaix sins, iehxic daaus waanz sins haec deel.

Ndael sins deec nauz: “Mengz gueh longl rooxheeh lingx longl, mengz deg sooh jiezraaix.”

## Bail Aul Meeuz

Qyuh xez gul haslix neec deec, lix daaus ndeeul, raanz gul xaus haec gul riangz yah ndeeul bail raanz seeh deel aul meeuz. Gul xic riangz yah deec dungx dooih bail maiz leeux.

Haadt deec hohdul ooh guas raanz bail roomh, laih bail genl hauxngaaz. Xez hohdul bail dangz raanz seeh yah deec xic deg xez ngaaz, seeh yah deec reenl hohdul bail dangz, xic guaih haux haec hohdul genl wangc wic leeux. Xez guaih haux banz deec, gul rooxnyiel dungx mbeebt leeux, ndiabk lac aul genl haux lac ndil.

Seeh yah deec xic heeh jongs leg deel dauc genl haux, jongs leg raanz deec bux ndeeul seedt guas dul laaux dauc, bux ndeeul yongc guas dul neec dauc dangz ndael raanz mooz leeux. Xez deec gul dangc jauc qyox, reenl deg legmbegt guehleeux, miz lix bux legsaail laez. Gul xic ndiabk: *Xez nix gul aul gueh dangclaez gueh nis? Xaamx gul riangz hohdeec dungx genl haux, aanh miz rooxheeh gueh dangclaez nyaab biagt. Gah bux legsaail ndeeul, miz rooxheeh gueh dangclaez nangh*

*qyuh jincjaangl ndaagt bongc legmbegt.* Ndiabk dangcnix miz deg, ndiabk dangcdeec yac miz deg.

Ieh xic gul miz ndaix miz gueh raag deeuz raanz deec, xeel hauxngaaz miz genl. Gul xic bail jaangl gaail qyox jongs baus gaail nooh xac yah deec, dungx gul hoongz qyoh qyah leeux. Wooil ndilraaz jongs legmbegt raanz deec, xeel gaais haux miz genl, yac lumz deg bail raanz deec aul meeuz bais.

## Loxdox Hal Yuangz

Duez loxdox xic saangl, duez yuangz xic dams. Loxdox nauz saangl xic ndil, yuangz nauz miz ndil, dams xaaux ndil.

Loxdox nauz: “Gul gueh yaangz suans ndeeul qyox saangl bih dams ndil.” Yuangz nauz: “Gul yac gueh yaangz suans ndeeul qyox dams bih saangl ndil.”

Hohdeec soongl duez xic byaaic bail heenz sianl ndeeul.

Heenz sianl deec lix xiangz humx leeux. Ndael sianl deec ndaml faix laail. Lix mbael faix ooh dauc heenz xiangz log leeux. Loxdox qyaux jauc xic qyuangh ndaix mbael faix genl. Yuangz qyaux leeux ndaangl diabk baangx xiangz, iadk eeul gueh raiz, yac genl miz ndaix mbael faix. Loxdox nauz: “Mengz qyox, gaais nix deg saangl bih dams ndil.” Mizguanc yuangz miz lingx sel.

Hohdeec soongl duez daaus byaaic bail nac ndaix jic

qyaamh, yius reenl xiangz unx deec lix gaais basdul ndeeul yac dams yac neec, yuangz xic soohnyaangh ndoonx bail ndael sianl deec genl nyiec. Loxdox guih xus dams jauc gueh dangclaez yac ndoonx bail miz ndaix. Yuangz nauz: “Mengz

qyox, gaais nix xic deg dams bih saangl ndil.” Mizguanc loxdox miz lingx sel.

Hohdeec xic bail ral duez waaiz beedklaix. Duez waaiz nauz: “Hohsul gahdamx qyox ndaanglgaus hoz, miz lix bux laez qyox ndaanglgaus longl. Gueh dangcnix xic miz hoz, yaangz laez duc ndil, saangl lix saangl deec ndil, dams lix dams deec ndil.”

## **Meeuz Haaul Hal Meeuz Foonx**

Meanh xaax, lix yah ndeeul xiangx soongl duez meeuz, meeuz haaul hal meeuz foonx. Yah deec jaiz duez haaul deec geh, gaais maz waanl xic aul haec duez haaul deec genl, miz haec duez foonx deec reedk neec laez. Duez foonx deec gah bail gaab waauc genl. Duez haaul deec rooxheeh ax bas genl ndooil, genl ninz genl ninz xic biz leeux naaus. Duez foonx deec ndaanglgaus deel gah ral gaais genl, ndingh langl ndingh xaangh ral gaais genl.

Lix ngonz ndeeul, yah deec riangz soongl duez meeuz deec nauz: “Haamh nix, hohsul dungx dax duez laez gaab ndaix waauc laail geh.” Hohdeec bux ndeeul bail baaih ndeeul ral, dangz jaangl henz, meeuz foonx xic gaab ndaix hac duez waauc. Meeuz haaul biz laail, ndaangl deel naagt, seedt miz ndaix, gaab miz ndaix duez laez. Meeuz haaul xic gueh raag meeuz foonx ndaix duez waauc ndeeul, seedt bail haec yah deec qyox, yah deec xic aangh leeux. Yah deec nauz: “Ax, gul lac ooh dul jic ngonz, miz lix yaangzmaz xeel haec hohsul genl. Mizguanc mengz roox bail gaab waauc genl ndaix, gul

xic miz ruangh bais. Qyox meeuz foonx gueh dangclaez gueh laagk? Deel rooxheeh gaab ndaix waauc miz?”

Meeuz haaul rooxnyiel xonz haaus nix, xic sooh daic. Yah jees deec hams deel, nauz: “Lix yaangzmaz suans mus?”

Meeuz haaul xic lingx nauz gaais suans deel gueh deec. Yah deec xic nauz: “Gaais nix deg guais gul, woil gul jaiz mengz laail guas, xeeh miz ndaix haec mengz gah bail ral gaais genl, ngonz nix mengz miz rooxheeh gaab duez waauc. Xaab xez nix bail genz, mengz gah bail ral gaais genl.”

## Duez Lingz Aul Roonghndianl

Lix duez lingz neec ndeeul qyuh heenz mbooh guehxamz. Deel eemh bail ndael mbooh, eemh reenl ndael mbooh lix roonghndianl. Duez lingz neec heeuh rianh leeux: “Miz hoz bais, miz hoz bais! Roonghndianl dogt dauc ndael mbooh bais!”

Lix duez lingz laaux ndeeul rooxnyiel, seedt dauc qyox, daaus heeuh rianh leeux: “Miz hoz bais, miz hoz bais! Roonghndianl dogt dauc ndael mbooh bais!”

Daaus lix duez lingz laaux rooxnyiel, seedt dauc qyox, yac riangzlangl hohdeec heeuh rianh leeux: “Miz hoz bais, miz hoz bais! Roonghndianl dogt dauc ndael mbooh bais!”

Jongs duez lingz qyuh heenz deec rooxnyiel, duc seedt dauc qyox. Leeuxboz heeuh rianh leeux: “Miz hoz bais, miz hoz bais! Roonghndianl dogt dauc ndael mbooh bais! Leeuxboz rauz aul deel ooh dauc rooh nyamz neeh!”

Jongs duez lingz xic binl bail gool faix laaux heenz mbooh deec. Duez lingz jees binl bail byaail faix xuangs jauc dauc lac gaml gal duez lingz laaux, duez lingz laaux daaus gaml gal duez lingz neec. Duez gaml duez dangz ndael mbooh. Duez lingz neec geh leeuxboz deec qyuh baaih haangx. Duez lingz neec xic yangx fengz bail aul roonghndianl, fengz reedk dangz ramx, roonghndianl xic miz reenl bais.

Duez lingz laaux qyaux jauc bail genz, xic yiusreenl roonghndianl qyuh genzmbenl. Deel waanz his, nauz: “Miz yungh aul bais. Roonghndianl haslix qyuh genzmbenl ndil geh maz.”

## Gueh Jaangs Rinl

Qyuh xez gul haslix neec deec, idt bil dangz xiangl, leeuxboz qyuh baiz dooh degt jaangs, ndilmaiz laauhhoh. Idt bux wenz sooil seeuc duc lix gaauh jaangs ndeeul. Damcdoos lix ndeenl jaangs ndeeul, xic guas leeux ndianl xiangl bais.

Lix bil ndeeul qyuh ndianl idt, lix raanz ndeeul bail bah baaih lac raanz gul gueh deenh raanz, jiez deec lix rinl ugtmal laail. Hohdul xic dungx xiez bail jiez deec aul rinl ugtmal gueh jaangs, gueh ndeenl leeux ndeenl moos.

Dangz lac laabt, gul gueh banz ndeenl jaangs ndeeul, gul riangz hohdeec nauz: “Hohsul qyox, gaauh jaangs gul nix nyeedt jiezraaix.” Lix bux ndeeul xic sooh seedt dauc reedt jaec gul qyox, ieh deel xic nauz: “Ndaagt jaangs gaangl liangc gaz heh, haslix nauz gueh nyeedt deeml mus maz.” Gul rooxnyiel hohdeec duc nauz gueh jaangs gaangl liangc miz ndiljaiz, xic hooznyaz. Gul xic gac ndiabk nauz: *Gul ramc deel gueh gons, daaus gueh gaauh moos.* Gul xic aul fengz ndeeul gaml jaangs dies xus genz faix, fengz ndeeul gaml xax waans mbah ramc jaangs gueh gons.

Xez ramc jaangs deec, xic bas meehfengz gul banz soongl lies, lies ndeeul xic weenl dangc neengc dangc neengc. Gul seedt bail dangz raanz, diec gul xic nauz: “Aul daaul dauc reed ooh, weenh xus mal, gaais nix aanh haabt dungx xus miz banz.” Mizguanc mac gul miz il, xic aul haabt dungx xus. Guas ndaix bungh ndeeul, meehfengz gul xic ndil. Mizguanc, idt baiz ribfengz mac dauc genz duc byah bail soongl baaih, miz dungxlumc xez yians deec.

## Duez Fuzlih Hal Duez Langx

Lix haamh ndeeul, duez fuzlih hal duez langx qyuh heenz haaic byaaic. Duez langx yius reenl ndael haaic lix roonghndianl, deel miz rooxheeh deg yaangzmaz, xic hams duez fuzlih: “Fuzlih, gaais qyuh ndael haaic baux baux deec deg yaangzmaz mus?” Duez fuzlih nauz: “Deg ndeenl bingc laaux ndeeul.”

Duez langx rooxnyiel nauz dangz bingc, naaiz xic rongz leeux, deel nauz: “Gueh dangclaez aul ndaix ndeenl bingc nix dauc genl mus?” Duez fuzlih nauz: “Hac genl ndeenl bingc nix, aul genl gaais ramx ndael haaic nix guehleeux, xic ndaix genl ndeenl bingc nix bais.”

Duez langx nih bail nih mal nauz: “Ramx ndael haaic laail dangcnix gueh dangclaez genl leeux mus? Gohsiz gul miz roox yuz ramx. Xaamx gul roox yuz ramx, xic rooxheeh rongz bail ndael deec aul dauc rooh.” Duez fuzlih nauz: “Mengz nih hac genl ndeenl bingc nix jiezraaix, gul xic baangl mengz, aul ndaagt rinl laaux headk xus eeul mengz, mengz xic yuz bail

diec haaic aul ndeenl bingc deec ndaix bais, mizguanc mengz miz haec genl guehleeux, xeel neec ndeeul haec gul.”

Duez langx soohnyaangh haanl: “Gul xeel dingz ndeeul haec mengz.” Ieh xic, duez fuzlih baangl duez langx aul ndaagt rinl laaux headk xus eeul, duez langx xic juangh bail ndael haaic daail bais.

Guas ndaix soongl ngonz, nuangx duez langx deec dauc hams duez fuzlih: “Fuzlih, goc gul soongl ngonz miz bail raanz, mengz rooxheeh deel bail jiez laez miz?” Duez fuzlih nauz: “Deel bail ndael haaic genl bingc, fih reenl daaus dauc.” Duez langx neec deec xic rooxheeh goc deel daail bais.

## Aangh Beah Moos

Xez gul haslix neec deec, xeehleeux maaic dangz xiangl hal xianglsis bais, yincwooil guas xiangl hal xianglsis duc ndaix wasbeah moos.

Lix bil ndeeul, lac dangz xianglsis, gul xic aangh laauhhoh, lac daaus ndaix wasbeah moos bais. Mizguanc mac gul riangz gul nauz: “Mengz laaux baizqyaaih bais, bil nix miz xex wasbeah moos haec mengz.” Gul xic ruangh laail, daic gaais meez raiz leeux, yac miz genl haux. Haslix soongl hoobt jeex xic dangz ngonz xianglsis, hoobt jeex daz idt, mac gul bail jeex miz xex wasbeah moos haec gul. Gul reenl boz ndooil ndaix wasbeah moos ieh, gul xic ruangh jaxxiz, yac hooznyaz mac gul laauhhoh. Gul ndiabk: *Ngonz xianglsis nac bux nac deenc wasbeah moos, gul miz lix xic aanh ngoonz feax ndooil bais.* Gul xic nyaz danghdauz leeux.

Dangz hoobt jeex langl, mac gul bail jeex xic xex ndaix doois beah noonhndingl ndeeul haec gul, nyangx gul yac xex ndaix haec leg deel. Leg deel riangz gul laaux dungx saauh, xooch deel nauz gueh Naangz. Lix meeh ndeeul daaus jeex goons,

deel xic riangz gul hal Naangz nauz: “Mac hohsul xex ndaix wasbeah moos haec hohsul ges.” Hohdul xic seedt bail wiuz leeux, bail dangz baangx dah xic bungz mac hohdul, ieh hohdeec xic haail wasbeah moos haec hohdul deenc. Hohdul xic deenc guas baangx dah mal raanz. Nac bux nac hanh wasbeah hohdul ndiljaiz, nauz hohdul lumc doois legwal nic, hohdul xic aangh gaz rux gaz rianz leeux, haamh deec gul xic genl haux waanl geh. Haadt langl, gul riangz jongs buxduz xuanh riangz luangs bail genz, xuanh riangz luangs bail lac, ndilmaiz laauhhoh.

## Bah Ndongl Faix

Lix duez ducrec ndeeul. Basdul raanz duez ducrec lix gal ruic neec ndeeul, ramx ruic seeus laauhhoh. Dauc ras wenl neec ndeeul ieh, ramx bians ndingl bais. Duez ducrec miz rooxheeh deg yaangzmaz, deel xic sooh ruic bail genz eemh. Deel eemh reenl duez xaangx hal duez raaih qyuh baaih genz bah faix. Duez ducrec xic byaaic bail jaec qyox, eemh reenl hohdeec bah ndongl faix neec deec hac leeux hac ndil.

Duez ducrec xic seedt bail nauz: “Qyees, nyac bah faix ges, hohsul guehmaz bah faix mus?” Duez xaangx hal duez raaih xic dangx, nauz: “Soongl ngonz nix hohdul dungx dax bux laez reengz laaux dol, haslix qyox fih ooh.” Duez ducrec nauz: “Dungx dax reengz xic nauz bah faix maz? Hohsul gueh dangcnix gueh xic haais faix yac haais ruic.”

Duez xaangx hal duez raaih dungx qyox, xic nauz: “Gueh dangcnix lix maz haais dangz ramx ruic mus?” Duez ducrec nauz: “Hohsul bah ndongl faix neec hac leeux hac ndil, wenl dauc naamh xic lail bail ndael ruic. Miz sins, hohsul bail qyox.” Duez xaangx xic byaaic bail baangx ruic genl ramx,

deel genl ramx, naamh xic bail ndael ndangl deel. Duez raaih bail baangx ruic aabk, ndingh aabk ndaangl ndingh nux geh, bians banz lumc duez raaih naamh nic.

Mbanh nix duez xaangx hal duez raaih xic rooxheeh ndaanglgaus gueh longl bais. Soohnyaangh daaus aul faix bail ndaml xus lumc yians. Duez xaangx bah gumz, duez raaih xic aul faix xus gumz, duez xaangx aul naamh mogt, duez raaih daih ramx xus. Hohdeec daaus ndaml faix banz lumc yians. Guas ndaix jic ngonz, ramx ruic daaus seeus bais.

## Ducrec Neec Gacnyiel Nauz

Lix meeh ducrec ndeeul lix saaml duez leg, duez ndeeul dal ndingl, duez ndeeul riez raiz, duez ndeeul riangl dinc. Raanz hohdeec qyuh jaangl ndongl faix laaux.

Lix ngonz ndeeul, mac ducrec riangz leg deel nauz: “Mac bail naz logt legbaag, hohsul qyuh raanz haabt dul ndilriz neeh noox. Xac mac daaus dauc heeuh sul nauz: ‘Neec haail dul haec mac, mac dauc dangz bais, haail dul nyamz neeh!’ hohsul xaaux haail dul noox.”

Lix duez langx ndeeul, qyuh heenz raanz gueh raag gacnyiel mac ducrec dangs leg deel. Xac mac ducrec bail dangz jail, deel xic xeenc ndangl gueh hingl lumc mac ducrec dauc nauz: “Neec haail dul, mac dauc dangz bais, haail dul nyamz neeh!” Duez dal ndingl nauz: “Haail dul nyamz neeh, mac rauz dangz bais!” Duez riez raiz nauz: “Miz deg mac rauz, hingl mac rauz miz banz dangcnix!” Duez riangl dinc nauz: “Mengz aul riangl mengz ndoonx jeeh dul dauc ndael, haec hohdul qyox!” Duez langx reenl hohdeec miz sins, deel xic aul riangl ndoonx bail ndael. Jongs duez ducrec yius reenl

ndaagt riangl laaux xongx laaux xongx, hohdeec xic soohnyaangh jamh dul gueh ndeedt, jamh ndaix ndaagt riangl duez langx deec. Deel jeedt laail xic ngas rianh leeux.

Xez deec mac ducrec daaus dauc dangz raanz. Deel yius reenl duez langx qyuh basdul raanz deel, xic jibt ndaix ndaagt faix bail haaix jauc duez langx deec. Duez langx jeedt laail xic xuangs reengz looh riangl dauc rooh, looh haaix riangl gons. Duez langx xic seedt deeuz bais. Mac ducrec xic hanh leg deel nauz: “Hohsul guaail jiezraaix.”

## Umx Legneec

Lix yaangz suans ndeeul haec gul xingh nih dangz. Bil gul qyuh Lachoos dooh sucyiz deec, hohdul lix sis hac bux suc raanz ndeeul qyuh. Raanz deec deg raanz jigt xaans ndeeul. Lix haadt xincjicluz ndeeul, dungxxoz gul umx leg seeh deel guas basdul raanz hohdul qyuh deec bail naz aul biagt. Gul xic riangz deel aul legneec deec dauc umx, legneec deec ndaix beedt guc ndianl dangcnix.

Jauc siec raanz hohdul qyuh deec lix gaais mbaagt lail faix ndeeul daaml bail genz raanz. Gaais mbaagt lail deec neec yac rianz. Baaih lac mbaagt lail deec lix fenz geack hal doongh legsiul dangc mooz leeux. Gul umx legneec deec bail genz raanz guehxamz. Xez gul daaus rongz dauc lac deec, rongz dangz mbaagt daz ngih, xic lix byaail fenz ndeeul sob diec haaiz gul. Gul hal legneec deec xic lac homz dauc lac hac ndil, mbaagt lail yac lac goongl dauc riangzlangl. Mizguanc, xez deec fengz guaz gul xic soohnyaangh saag ndaix baangx genz raanz deec, fengz sooix yac haslix umx legneec deec xus ndeedt ndeedt. Haaix legneec deec daic

ndeenx leeux, honl gul yac mbinl, gal yac seens dalraab leeux.

Gul umx legneec deec bail dangz basdul, deel haslix daic rianh leeux. Hoh qyuh riangz gul deec xic hams: “Guehmaz haaix legneec nix daic banz dangcdeec mus?” Gul xic lenh haec hohdeec, hohdeec xic nauz: “Daaus moos mengz luanl umx leg feax bail genz raanz max! Haaix leg feax dogt dauc lac daail, mengz xic qyah gueh bais.” Ngonz deec, gal gul xic seens ngonz daz laabt. Xaab daaus deec dauc, gul xic ndillaaul umx jongs legneec.

## Jazjinh Xex Bas Duez Bidt

Jazjinh qyuh raanz baussuc, baangl baussuc gueh hoongl. Baussuc ndiabk aul gueh dangclaez dauc senh Jazjinh. Lac dangz xiangl, baussuc riangz Jazjinh nauz: “Jinh, mengz bail baangl gul xex aul bas duez bidt dauc.” Baussuc xic yangx xeenz hoz xex hac xib duez bidt haec Jazjinh ndooil. Jazjinh yac miz nauz yaangzmaz, deel xic sooh ooh bail xex bidt.

Jazjinh xex ndaix bidt, xic xiez buxduz ndil deel bail baangx dah gac bidt genl, yac ndaix lauc bail riangz xaabt. Xez hohdeec lac genl nooh bidt deec, Jazjinh xic gueh bic nauz: “Yiz jiuh deez jiuh, rauz xic aul nooh bidt dauc xal jiuh. Hel jiuh yiz sez baz, rauz xic aul gal faz xaabt lauc, xeel ndaagt jauc bail raanz haec baus. Saanc jiuh hel sez xiz, ngonz nix rauz aul genl lauc gueh fiz.” Hohdeec genl ieh leeux bais. Jazjinh xic ndaix roongl sues ndaagt jauc bidt xus dox dauc raanz.

Jazjinh daaus dauc dangz raanz, baussuc hams: “Jinh, bidt qyuh jiez laez mus?” Jazjinh xic qyogt bas bidt guas daih dox dauc, yangx haec baussuc, nauz: “Baus, bas duez bidt qyuh

jiez nix.” Baussuc reenl ndaagt bas bidt deec, xic nauz: “Gul nauz haec mengz xex bas duez bidt roox byaaic, roox raiz heeul ‘aad aad’ deec ges. Mengz guehmaz xic xex ndaagt bas duez bidt nix haec gul mus leex?” Jazjinh xic haanl: “Gaais nix deg bas duez bidt roox byaaic, roox raiz heeul ‘aad aad’ deec looh. Miz deg bas duez gais, yac miz deg bas duez mul jiez laez.” Baussuc nauz miz hingz Jazjinh, deel miz roox gueh dangclaez gueh, xic ndamx ndooil bais.

## Gueh Raag Xeenz

Xez gul haslix neec deec, gul ganx riangz diec gul aul xeenz. Idt daaus diec gul haec joz ndeeul mizxic soongl joz ndooil, yac miz lix daaus laez haec gul dangz manz, gul xic hooznyaz diec gul laauhhoh.

Lix ngonz ndeeul diec gul miz qyuh raanz, gul xic ndaix fah jimz bail ngaaux lungc siangl deel ndaix hac xib manz, ieh xic daaus xooih gueh ndil. Guaslangl diec gul dauc dangz raanz, gul xic ndillaaul deel haaix, yac miz gaame bail raanz genl hauxxauz. Qyuh heenz raanz gul lix ndeenl raanz faix neec ndeeul, ndael deec lix nyas laail. Gul xic ndoonx bail ndael deec ninz, ninz yac ninz miz ndaagt. Dangz jaangl henz, gul rooxnyiel raanz gul lix wenz dungx gaangc nauz: “Aul gac mul bail jeex gaail.”

Guas ndaix neec ndeeul daaus rooxnyiel mul raiz heeul. Gul xic daic miz gaame xuangs hingl, yincwooil gul laaul hohdeec rooxnyiel. Haamh deec miz ndaix genl hauxxauz yac dungx ieh, qyuh ndael deec ninz yac xeengx. Dangz xez lac roongh deec, hohdeec ndingh genl lauc ndingh genl nooh, yac

rooxnyiel hohdeec gah dungx nauz: “Nooh duez mul nix waanl laauhhoh, hohrauz aul genl guehleeux, miz haec liel.” Gul xic ndunx naaiz, yac hooznyaz, miz rooxheeh gueh dangclaez ndil.

Mbenl roongh, gul bail dangz raanz xic sooh bail lac ringe geadt wal xaaus, reenl ndael xaaus miz laams gaais nooh laez. Gul xic weenh wal xaaus bail basnaamh hoongz guaangc luaangc deec, ieh gul xic seedt bail deenh ninz mog gomh jauc ngonz laabt. Xaab xez deec dauc, gul xic miz gueh raag xeenz daaus laez bais.

## Jazjinh Xaaux Guangc

Meanh xaux, leeux beangz duc genl nooh wenz. Xaamx bux wenz daail, xic aul ras ndaangl bux daail deec gueh sael, ieh xic leeux mbaanx dungx banl aul nooh bail genl. Mbaanx Jazjinh deec idt bux wenz daail, Jazjinh yac bail aul gaais nooh bux wenz daail deec, mizguanc Jazjinh ndaix nooh dauc dangz raanz, deel miz gueh genl. Deel xic neenl gaais nooh laez deg nooh bux laez, ieh xic iangx xus genz jas.

Dangz ngonz mac Jazjinh daail deec, leeux mbaanx xic dauc raanz Jazjinh aul dungx banl nooh mac deel bail genl. Boz wenz bail dangz raanz Jazjinh reenl deel ndaix faix doos gueh mbahyaangz. Boz wenz miz rooxheeh Jazjinh doos yaangmaz. Hohdeec xic hams Jazjinh: “Jazjinh, mengz doos yaangmaz mus?” Jazjinh haanl: “Doos gueh gaabt gueh ginge, doos gueh ringc jangl dooix, doos gueh gogt gueh gaabt, doos gueh raabt jangl mul, xohrez sul xaaux roox.”

Dangcnix, boz wenz xic lac dungx banl nooh mac Jazjinh. Jazjinh xic miz haec hohdeec banl nooh mac deel. Boz wenz riangz Jazjinh nauz: “Mengz miz aul nooh mac mengz haec

hohdul, gaais deec, mengz xic aul gaais nooh boohmeeh  
hohdul deec daaus haec hohdul.” Jazjinh xic ndingh doos  
guangc ndingh haanl: “Doos ginc ginc, nooh mac mengz  
qyuh lac ringc, doos gaabt gaabt, nooh diec mengz qyuh  
ndael raabt... qyuh byaail fal... qyuh wis haz...” Boz wenz  
deec hooznyaz xic daangs bux daangs aul nooh daaus, xic  
deeuz bail raanz leeux bais. Hohdeec deeuz ieh, Jazjinh xic  
aul mac deel xus ndael guangc, ieh xic dez bail haml xus lac  
xaagt. Jazjinh laaul boz wenz dauc gueh raag aul mac deel  
bail genl. Deel xic ngonz ngonz daez mac deel. Xaab Jazjinh  
xaaux guangc dauc, wenz beangz xic miz genl nooh wenz  
bais.

## Bungz Wenz Waaih

Idt daaus lac ooh dul, mac gul duc dangs nauz: “Nec, qyuh rooh xic reel neeh noox! Jaangl haamh nyac gah bail jiez laez. Xeenz yac aul qyaux ndilriz neeh.” Xez deec gul reenl jic xonz haaus nix miz banz neenl, yac ndiabk miz dangz lix yaangzmaz haec gul banz ndillaaul. Mizguanc xez gul dooh gaucyiz deec, lix yaangz suans ndeeul haec gul laaul beens dangz xez nix.

Xez deec, jiez gul qyuh liez xozxaaul jail. Jaangl haamh xuangs sel bail raanz, leeuxboz dungx dooih dangz jaangl ronl, xic dungx byah bais. Deeuz ronl gul guas bail raanz deec lix nec laabt, lix bux wenz ndeeul byaac dauc riangzlangl gul, mizguanc gul ndiabk, bux deec aanh deg wenz guas ronl, gul xic miz ndillaaul nec laez.

Bail dangz raanz, gul reenl jaangl biangh haslix wenz nangh, hohdeec fih ninz, gul xic riuc ndaix ndeenl dianldungx gah bail seezsoh. Gul reenl baaih legsaail lumc bux laez haslix wenz nic, gul xic miz rooxnyiel ndillaaul nec laez. Gul ndoonx bail seezsoh ndaix nec ndeeul, xic lix bux wenz

ndeeul dauc riangzlangl, gul jaailnauz deel deg legmbegt, xic miz gauc deel maz. Dangz langl, deel byaaic dauc reedt jaec gul. Gul nac bians leeux, soohnyaangh runs dauc, lac aul dianldungx haaix deel. Deel xic saag ndaix jeenl gul, gul xic ngas rianh leeux. Deel qyaabk gul ndaix dianldungx xic deeuz bail rooh bais. Gul soohnyaangh seedt dauc raanz laaul gaais gal seens leeux, honl yac mbinl leeux naaus bais. Lix yaangz suans nix ieh, gul xic ndiabk dangz gaais haaus mac gul dangs deec.

## Langx Gueh Raag Yuangz

Lix hamh ndeeul, meeh langx dez duez langx neec ndeeul bail dangz heenz xogt yuangz raanz ndeeul. Meeh langx xic nauz haec leg deel qyuh heenz hooh yuangz xac, deel xic qyox saaml baaih sis mianh neec ndeeul. Ieh deel xic yuaanc bail dangz ndael hooh yuangz. Duez langx neec qyox reenl xic aangh leeux, hac bail riangzlangl hac ndil, mizguanc deel miz gaamc bail riangzlangl mac deel, yincwooil mac deel nauz haec deel qyuh jiez deec xac.

Guas ndaix neec ndeeul, duez langx neec deec rooxnyiel yuangz raiz heeul, ieh meeh langx xic ooh guas hooh yuangz dauc rooh, bas deel gaamz ndaix duez yuangz ndeeul dauc. Meeh langx xic dez leg deel hal duez yuangz neec deec deez bais.

Meeh langx weenh duez yuangz deec xus basnaamh, nauz haec duez langx neec deec dez, duez langx neec deec sooh rooxnyiel mac deel nauz, deel sooh seedt bail, gaamz ndaix duez yuangz deec, deel xic sooh dez bail. Duez langx neec deec ndaangl deel haslix neec laail, duez yuangz deec laaux

geh deel. Deel dez duez yuangz deec henc bool naanh leeux. Mac deel yac miz baangl deel dez, byaaic riangzlangl qyox ndooil.

Hohdeec dauc gueh raag ndaix soongl haamh, xic lix wenz yuis reenl bais. Boz wenz xic heeuh aul haaix langx, baiz nix leeux mbaanx xic ooh bail laih duez langx. Mizguanc duez langx neec deec haslix dez duez yuangz ndeeul seedt bail goons meeh deel. Duez meeh deec xic seedt riangzlangl, xez wenz laih hac deebk deec, meeh deel xic baiz dooh gaamz leg deel hal duez yuangz deec seedt bail ndael ndongl faix ndiex. Boz wenz deec xic laih miz deebk daaus bail raanz ndooil.

## Duez Haanxhah Ral Meeh

Lix baangc haanxhah neec qyuh ndael damz ramx yuz bail yuz mal, guehxamz ndilmaiz laauhhoh. Hohdeec yuz dangz heenz damz, ndiabk aul eemh heenz damz banz dangclaez, hohdeec yius reenl duez rog neec ndeeul. Hohdeec heeuh duez rog neec deec bail riangz hohdeec guehxamz. Duez rog neec nauz: “Gul miz roox yuz, gul riangz hohsul guehxamz miz banz.”

Ieh jongs duez haanxhah xic daaus yuz bail ndael damz guehxamz. Guehxamz ieh, hohdeec xic nauz: “Hohrauz bail ral mac hohrauz bais.” Ieh hohdeec xic yuz bail ral mac hohdeec, bail bungz duez nyaauh, xic hams duez nyaauh nauz: “Mengz reenl mac hohdul miz?” Duez nyaauh haanl nauz: “Reenl has! Mac hohsul dal laaux baux laaux baux.”

Jongs duez haanxhah xic yuz bail bungz duez byal ndeeul, heeuh gueh mac hohdeec aangh leeux. Mizguanc duez byal xic nauz: “Hohsul heeuh longl bais, gul miz deg mac hohsul, mac hohsul dungx haaul.”

Duez haanxhah daaus yuz bail mal bail mal, yius reenl duez baul, dungx haaul haaul, hohdeec daaus heeuh gueh mac hohdeec aangh leeux. Duez baul nauz: “Hohsul heeuh longl bais, gul miz deg mac hohsul, mac hohsul lix sis gal, hohsul sooc, gul lix beedt gal.”

Duez haanxhah daaus yuz bail, bungz duez weal lix sis gal, daaus heeuh gueh mac hohdeec aangh leeux. Duez weal nauz: “Gul miz deg mac hohsul, hohsul heeuh longl bais. Gul hal mac hohsul lix neec dungxlumc, mizguanc gul miz deg mac hohsul.”

Mbanh nix, duez gueec yuz dauc dangz nauz: “Jongs leg, gul deg mac hohsul.” Ieh jongs duez haanxhah xic xingh eemh xingh eemh duez gueec deec, dal laaux laaux, dungx haaul haaul, lix sis gal, miz dungxlumc hohdeec neec laez. Duez gueec xic riangz hohdeec nauz: “Hohsul haslix neec, laaux xic dungxlumc mac bais.” Ieh jongs duez haanxhah deec xic aangh leeux, nauz: “Hohrauz ral reenl mac bais.”

## Duez Duez Guas Ndianl Xeengx

Ndianl xeengx lix haadt ndeeul, duez mod bail dangz ndongl faix ral gaais genl. Ndongl faix bians leeux, hoobt heenz yac miz lix duez maz qyuh, deel nih nauz: “Buxduz gul bail jiez laez leeux mus?” Duez mod soohnyaangh rooxnyiel duez rog ndeeul hoongz. Deel xic qyaux jauc gauc, yius reenl duez rogxeeul duh byaail faix. Duez mod soohnyaangh heeuh: “Rogxeeul mengz ndil ndaic las? Rogeenh, hal jongs duez rog ndooil deec, hohdeec bail jiez laez leeux mus?” Rogxeeul nauz: “Dangz ndianl xeengx bais, hohdeec bail baaih naanxfangc guas ndianl xeengx bais, bil moos ndianl rauc xaaux daaus dauc.” Duez mod hams: “Mengz yac bail maz?” Rogxeeul nauz: “Gul miz bail. Gul gueh mongx banz ndil leeux bais, gul qyuh jiez nix guas ndianl xeengx.”

Duez gobt rooxnyiel xic yuaanc guas ndael mbooh dauc genz, nauz: “Mod, gul jazjaz hac bail ral mengz riangz mengz dungx byah.” Duez mod hams: “Mengz nauz yaangzmaz mus? Mengz yac aul bail baaih naanxfangc deec maz?” Duez gobt nauz: “Miz. Gul hac bail ninz bais.” Duez mod qyox bail genzmbenl, dalngonz haslix qyuh jaangl mbenl, deel xic

hams gobt nauz: “Dalngonz xaaux ooh dauc xic hac daaus bail ninz baic maz?” Duez gobt nauz: “Hohdul aul ninz guas ndianl xeengx, miz genl miz xas, dangz bil moos ndianl rauc xaaux ooh dauc rooh.”

Duez gobt ndingh nauz ndingh aul dinl ronh naamh gueh gumz, gus neec ndeeul xic gueh gumz banz bais. Duez gobt riangz duez mod nauz: “Mengz qyox, ndianl xeengx qyuh ndael nix rauc laauhhoh, miz laaul rumz, miz laaul nail.” Duez mod byaaic bail gauc, ndael gumz nix bah ndaix ndil jiezzaaix. Duez mod nih: “Gul yac banz bail ral mbahyaangz qyaux guas ndianl xeengx genl bais!” Deel xic bail ral ndaix noonl bail raanz qyaux guas ndianl xeengx.

## Gueh Raag Hauxdais

Idt daaus genl hauxdais, gul duc ndiabk dangz yaangz suans ndeeul. Xez gul haslix qyuh ndael mbaanx dooh sel deec, lix ngonz ndeeul lac laabt, xuangs sel ieh, gul xic hal jongs buxduz bail xuanh.

Jaangl mbaanx lix biangh sianl hauxdais ndeeul jazjaz banz saz. Hohdul guas jaangl ronl yius reenl, lix bux ndeeul nauz: “Dauc rauz bail aul hauxdais dauc saz bees!” Leeuxboz duc haanl nauz: “Bail las.” Hohdul xic dungx singl seedt bail ndael sianl deec eeux hauxdais boc byaabk leeux. Bux ndeeul ndaix waagt ndeeul, aangh laauhhoh, dez bail dangz raanz nyangx gul saz genl.

Raanz deec daaus hoongl dauc dangz, xic lix wenz nauz: “Jacbanh jongs nyeez bail gueh raag hauxdais raanz mengz ges.” Ieh raanz deec xic bail nauz haec diec mac hohdul. Hoh ndooil xic daangs bux daangs bail raanz leeux, mizguanc gul miz gaame bail raanz, yincwooil diec mac gul duc rooxheeh gul bail gueh raag hauxdais. Gul ndiabk: *Xaamx gul bail raanz aanh ngaix diec gul ndah*, gul xic seedt bail baaih genz

hoox max ndiex. Xez deec gul saml wangc laauhhoh, miz roox aul gueh dangclaez ndil.

Laabt leeux bais, mac gul reenl gul fih dangz raanz, xic bail hams boz buxduz gul, xaaux rooxheeh gul qyuh genz hoox max ndiex. Mac gul ndaix faix neec bail nyoox gul, gul xic daic doonc, deel xic xaauh jeenl gul bail raanz. Xez deec diec gul nangh basdul xac, deel hooznyaz laauhhoh. Gul bail dangz basdul, deel xic soohnyaangh heedt gul ndunl genz dangs, ndingh heedt ndingh aul faix neec faadk daaix gul. Xez deec jeedt laauhhoh yac hooznyaz jaxxiz, mizguanc miz gaamc daic. Xez nix gul laaux bais, nih dangz xez neec gueh raag hauxdais deec xic qyeenh laauhhoh.

## Legsaail Neec Degxangz

Meanh xaax lix legsaail neec ndeeul degxangz laail, mizguanc deel guaail laauhhoh. Lix ngonz ndeeul, deel riuc ndaix fah xax bail ndael ndongl faix laaux guehxamz. Deel bail dangz ndael ndongl faix laaux deec, xic yius reenl saaml duez gugt neec xaax roox byaac neeh neeh. Deel aul xax ramc hooz hohdeec gueh gons, ieh xic aul faix neec dauc xas soongl jauc gueh soml, daaus buc jauc ndingh eeul dungx raangh. Ieh deel xic binl bail gool faix laaux heenz jongs duez gugt neec deec, eemh meeh hohdeec dauc fih.

Guas ndaix gus ndeeul, meeh gugt deec bail ral mbahyaangz haec leg deel genl daaus dauc dangz bais. Meeh gugt deec xic aul mbahyaangz xus bas haec leg deel genl, reenl leg deel miz ax bas, deel xic aul bas deel mbooil leg deel, reenl jauc saaml duez leg deel mboodk bais. Xooix legsaail neec deec qyuh byaail faix mbaadt reeul miz ndaix, xic reeul hingl laaux.

Meeh gugt deec rooxnyiel, xic eemh bail byaail gool faix yius reenl legsaail neec deec qyuh byaail gool faix, deel xic

hooznyaz laauhhoh. Duez gugt meeh deec xic bail gaadt gool faix deec. Deel gaadt gool faix deec bail dingz ndeeul, xic roox hes ramx bais, deel xic seedt bail ral ramx genl. Legsaail neec deec gaaail laauhhoh, xic doodt maauh ndinghal beah deel weenl xus byaail gool faix deec, xic daaus deez bail gool faix laaux ndooil.

Mbanh nix meeh gugt deec bail genl ramx daaus dauc dangz, deel reenl byaail gool faix lix maauh hal beah, xic jaailnauz deg legsaail neec deec, deel xic daaus gaadt gool faix deec gueh raagt. Xez gool faix laaux lac raagt deec, deel xic qyuh baaih lac gool faix deec daez, lac aul genl xooix legsaail deec, mizguanc gool faix laaux deec raagt dauc lac xic naabt deel daail bais. Legsaail neec deec reenl meeh gugt deec ngaix gool faix deec naabt daail, deel xic bail raanz heeuh raanz deel dauc dez gugt bail raanz. Hohdeec xic dauc dez dangz meeh dangz leg bail raanz gueh genl.